

共同經課 - 1

創世記三十七章一節~四節，十二節~二十八節

1 雅各倚起迦南地，就是伊的老父寄腳的所在。2 雅各的世系記佇下底。約瑟十七歲及伊許個兄相及顧羊。伊是一個囡仔，及伊的老父的細姨辟拉的子，悉帕的子常常做陣。約瑟將伊許個兄的歹品行給in老父講。3 今以色列疼約瑟卡贏過佇疼伊的眾子，因為約瑟是伊年老生的；伊給伊做一領彩色的衫。4 約瑟許個兄看見老父疼約瑟過頭疼in，就怨恨約瑟，袂會及伊講和睦的話。12 約瑟的兄去示劍，飼老父的羊。13 以色列對約瑟講：「恁兄豈毋是佇示劍飼羊嗎？你來，我欲差你去in遐。」伊應講：「我佇遮。」14 伊給伊講：「你去看恁兄有平安抑無，羊群有平安抑無，倒來給我講」；就差伊出希伯崙的山谷，伊就去到示劍。15 有人撞著伊佇山裡迷路，就問伊講：「你啲尋甚麼？」16 伊講：「我啲尋我的兄，請給我講，in佇叨落啲飼羊？」17 彼人講：「in已經離開遮，因為我聽見in啲講，咱來去多坵。」約瑟就去趕伊的兄，抵著in佇多坵。18 in遠遠看見伊，伊猶未行到in遐，in就相及計謀欲害死伊，19 大家相及講：「你看！做夢者來啦。20 乎來！今咱給伊剖死，穴佇一個乾井，才來講有歹獸食伊。咱才看伊的夢將來怎樣。」21 流便聽見，就救伊脫離in的手，講：「咱毋通害伊的生命」；22 流便閣對in講：「毋通互伊流血，通給伊穴佇此個曠野的乾井，毋通下手害伊。」意思是欲救伊脫離in的手，互伊倒去伊的老父遐。23 約瑟到伊的兄遐，彼霎in就褪約瑟的外衫，就是伊身軀彼領彩色的衫，24 就掠伊穴落井；彼個井是乾的，內面無水。25 in坐啲食餅，抬目看，看見一陣以實瑪利人對基列來，用駱駝背香料、乳香、沒藥，欲帶落去埃及。26 猶大對諸個兄弟講：「咱剖死咱的小弟，罔密伊的血，有甚麼利益？27 咱來給伊賣互以實瑪利人，毋通下手害伊；因為伊是咱的小弟，咱的骨肉。」兄弟聽伊。28 有許個米甸的生理人對遐過，伊的兄就給約瑟對井內拔起來，將伊賣互以實瑪利人，得著二十個銀。許個人就帶約瑟去埃及。

共同經課 - 2

詩篇一百零五篇一節~六節，十六節~二十二節，四十五 b 節

1 恁著感謝耶和華，求叫伊的名，佇萬百姓的中間報揚伊的所做！2 著向伊吟詩，向伊唱歌謳嘍！談論伊一切奇妙的所行！3 著因為伊的聖名來誇口！尋耶和華的人，心內著歡喜！4 著求耶和華及伊的權能，常常尋見伊的面。5 伊的奴僕亞伯拉罕的後裔，伊所揀雅各的子孫啊，恁著數念伊所做奇妙的事及伊的神蹟，及伊的嘴判斷的話。6 (見詩。) 16 伊命令飢荒降落佇彼個土地，將所倚靠的米糧一概斷絕，17 伊佇in的頭前差一人去——約瑟受賣做奴僕。18 人用腳鏑傷伊的腳；伊受鐵煉捆縛。19 耶和華的話試煉伊，直到伊所講的應驗。20 王差人給伊解開，就是治理百姓者，給伊解放。21 設立伊做王家的主，管理伊一切所有的，22 通隨意縛伊的人臣，將智慧教示伊的長老。45 恁著謳嘍耶和華！

共同經課 - 3

羅馬書十章五節~十五節

5 因為摩西寫講：「人行彼個對律法的義的，欲對伊來活。」6 若是對信的義是親像按呢講：「你莫得心內講：是誰欲上天啊？(就是欲導基督落來；) 7 抑是是誰欲落深淵啊？(就是欲導基督對死人中起來。)」8 伊到底講甚麼啊？是講：言語是近佇你，是佇你的嘴，佇你的心。(就是阮所傳此個信的話語。) 9 就是你若用嘴認耶穌做主，用心信上帝互伊對死人中起來，就會得著救。10 因為人用心信，致到得著義；用嘴認，致到得著救。11 聖經講：「見若信靠伊的人不致見謫。」12 因為猶太希利尼攏無分別，像一個主是眾人的主，款待攏總求伊的人極其富裕。13 因為「見若求叫主的名的人，欲得著救。」14 總是，in所猶未信的，豈可會求叫伊？所未聽見的，豈可會信伊？若無人傳，豈可會聽見？15 若毋是奉差，豈可會傳？照所記載講：「傳諸個好事的福音者，in的腳步爻到怎樣！」

共同經課 - 4

馬太福音十四章二十二節~三十三節

22 伊隨時迫學生上船，代先過去彼旁，聽候伊四散眾人。23 四散眾人了後，就家已上山祈禱。已經暗，只有伊家已佇遐。24 彼時船佇海中，互湧搖出，因為是對頭風。25 暝時四更，耶穌對海面行，就近in。26 學生看見伊行佇海面，就生驚，講：「是怪物！」因為驚，就喉叫。27 耶穌連鞭及in講話，講：「安恁的心，是我，毋免驚！」28 彼得應伊講：「主啊！果然是你，就命令我行水面就近你。」29 伊講：「來。」彼得就對船裡落去，行水面，欲就近耶穌；30 總是看見風，就驚，啲欲沈落去，就喉叫講：「主啊，救我！」31 耶穌隨時伸手牽伊，講：「小信的人，啥事僥疑？」32 in上船，風就定。33 船裡的人拜伊，講：「你真正是上帝的子。」